

高橋選

上

服部文庫
イ 17
2059
1



F17
20591

文政再板

南郭先生訓點

三陽齋

李于鱗唐詩選

江戸

書肆

高山房

梓行

唐詩選序

唐無五言古詩而有其古詩陳

子昂以其古詩為古詩弗取也

七言古詩惟子美不失初唐氣

格而縱橫有之太白縱橫往往

疆弩之末間雜長語英雄欺人

耳至如五七言絕句實唐三百

年一人蓋以不用意得之即太

白亦不自知其所至而工者顧

失焉五言律排律諸家槩多佳

句七言律體諸家所難王維李

頎頎臻其妙即子美篇什雖衆

憤焉自放矣作者自苦亦惟天

實生才不盡後之君子乃茲集

以盡唐詩而唐詩盡于此

濟南李攀龍撰

附言

一近體詩盡於唐盡也者盡善之謂而莫善於滄溟選蓋後世祖述唐人者家選戶論大抵宋人好自用其調絕響大雅即所選若論漆桶掃帚亦惟摸索而已及南宋嚴滄浪豁然眼目全象始見雖有來者不能閒然然止論之未遑選詩明興高廷禮品彙正聲出而唐人諸家

玄黃不蔽詩亦簡拔神駿冀北遂空滄
溟繼興益猶以廷禮為旁通多可艾柞
益嚴掄選數百首唐詩之粹森如也後
有唐仲言解及十集要其所出入亦惟
首鼠高李間不足列之選者他若鍾氏
詩歸以沙投金非再經淘汰無見其真
故唐詩莫善於滄溟選又莫精於滄溟
選

一 人或謂滄溟選過刻然予則謂後世諸
家紛然邪路旁徑徃徃秦塞初學進步
一 左蹶然陷大澤故取路之法明為之
標而後不容田夫欺又譬諸入崑岡采
玉玉石磊砢愚者奚別非棄廡下或襲
燕石必遇卞和氏而後天下知連城故
學詩先擇其善者而從之不必取其臆
準繩一立離明輪工無施不可滄溟之

荆安知非嚴師友哉。

一初學熟滄溟選乃後稍稍就諸家讀焉。
 則左右取之無不逢其原諸家則滄浪
 詩話品彙正聲奔州卮言元瑞詩數此
 其傑然者亦不可不讀焉蔣氏所注二
 三評語諸家已具讀之可不讀亦可仲
 言解備之掌故則徃徃便于質訪至其
 解詩意謬妄居半不必取也且詩貴興

象祇謂擾心胡用喋喋解之為若夫誦
 三百篇讀騷讀選及歷代諸家人人
 知之不待具論博文約禮雖小伎亦然
 一世有唐詩訓解其書剽襲唐詩選及仲
 舒注仲言解等偽選列藝文而詩全用
 于鱗選出入一二其所題目既是不知
 滄溟者所為序則文理不屬始無意義
 中間引道子數語出中郎他文日中郎

於滄溟不啻仇視則亦不知中郎者所
為總評中竽濫太甚評注取蔣唐頗為
刪補唯是拙工代斷不救傷指其他謬
妄不可勝計要之于鱗嘉隆之間為一
代文宗中郎雖後亦別為一家風靡晚
學於是或書賈問師資二家聲譽為壽
張之具並署篇端所倩村學究不辨菽
麥迺急求錢致此鹵莽已于鱗選貴乎

精嚴毫釐出入或謬千里故今所考訂
不得不為于鱗雪冤略贅數語以發其
質若夫寒鄉乏挾書訓解亦非無一助
要辨其真不眩其偽則不必瑕殄
一唐詩選原本以蔣注行其辨既具于前
方于鱗選時豈必斯後有蔣注今所考
訂要在見真面目何憂無注初學或昧
典故諸書既自端然各就考之可寒陋

之士往往責備一書蔣注訓解豈備哉
 一原本諸刊頗多或有增二三三者今不取
 也如字有異多從原本尤善者兩可難
 裁則就品彙詩刪詩解十集考之從其
 多且正者

服元喬

卷之一

五言古 共十四首

卷之二

七言古 共三十二首

卷之三

五言律 共六十七首

卷之四

五言排律 共四十首

唐詩選
卷之五
卷之六
卷之七

卷之五

七言律 共七十三首

卷之六

五言絕句 共七十四首

卷之七

七言絕句 共百六十五首

集採共計一百二十八家

詩選統載四百六十五首

唐詩選卷之一

濟南李攀龍編選

五言古

述懷

魏徵

中原還逐鹿 投筆事戎軒 縱橫計不就 慷慨

慨志猶存 仗策謁天子 驅馬出關門 請纓

繫南粵 憑軾下東藩 鬱紆陟高岫 出沒望

平原 古木鳴寒鳥 空山啼夜猿 既傷千里

唐詩選

目還驚九折魂豈不憚艱險深懷國士恩
季布無二諾侯嬴重一言人生感意氣功名誰復論

感遇

張九齡

孤鴻海上來池潢不敢顧側見雙翠鳥巢
在三珠樹矯矯珍木顛得無金丸懼美服
患人指高明逼神惡今我遊冥冥弋者何
所慕

薊丘覽古

陳子昂

南登碣石館遙望黃金臺丘陵盡喬木昭
王安在哉霸圖悵已矣驅馬復歸來

子夜吳歌

李白

長安一片月萬戶擣衣聲秋風吹不盡總
是玉關情何日平胡虜良人罷遠征

經下邳圯橋懷張子房

子房未虎嘯破產不為家滄海得壯士椎

秦博浪沙報韓雖不成天地皆震動潛匿
遊下邳豈曰非智勇我來圮橋上懷古欽
英風唯見碧水流曾無黃石公嘆息此人
去蕭條徐泗空

後出塞

杜甫

朝進東門營暮上河陽橋落日照大旗馬
鳴風蕭蕭平沙列萬幕部伍各見招中天
懸明月令嚴夜寂寥悲笳數聲動壯士慘

不驕借問大將誰恐是霍嫖姚

玉華宮

溪回松風長蒼鼠竄古瓦不知何王殿遺
構絕壁下陰房鬼火青壞道哀湍瀉萬籟
眞笙竽秋色正瀟灑美人為黃土况乃粉
黛假當時待金輿故物獨石馬憂來藉州
坐浩歌淚盈把冉冉征途問誰是長年者

送別

王維

下馬飲君酒。問君何所之。君言不得意。歸臥南山陲。但去莫復問。白雲無盡時。

西山

常建

一身為輕舟。落日西山際。常隨去帆影。遠接長天勢。物象歸餘清。林巒分夕麗。亭亭碧流暗。日入孤霞繼。洲渚遠陰映。湖雲尚明霽。林昏楚色來。岸遠荆門閉。至夜轉清迥。蕭蕭北風厲。沙邊雁鷺泊。宿處蒹葭蔽。

圓月逗前浦。孤琴又搖曳。冷然夜遂深。白露沾入袂。

宋中

高適

梁王昔全盛。賓客復多才。悠悠一千年。陳迹惟高臺。寂寞向秋州。悲風千里來。

與高適薛據同登慈恩寺浮圖

岑參

塔勢如湧出。孤高聳天宮。登臨出世界。磴

道盤虛空突兀壓神州崢嶸如鬼工四角
 礙白日七層摩蒼穹下窺指高鳥俯聽聞
 驚風連山若波濤奔走似朝東青松夾馳
 道宮觀何玲瓏秋色從西來蒼然滿關中
 五陵北原上萬古青濛濛淨理了可悟勝
 因夙所宗誓將桂冠去覺道資無窮

幽居

韋應物

貴賤雖異等出門皆有營獨無外物牽遂

此幽居情微雨夜來過不知春州生青山
 忽已曙鳥雀繞舍鳴時與道人偶或隨樵
 者行自當安蹇劣誰謂薄世榮

南磻中題

柳宗元

秋氣集南磻獨遊亭午時迴風一蕭瑟林
 景久參差始至若右得稍深遂忘疲羈禽
 響幽谷寒藻舞淪漪去國魂已遠懷久淚
 空垂孤生易為感失路少所宜索莫竟何

事徘徊。自知誰為後來者。當與此心期。

早發交崖山還太室作

崔署

東林氣微白。寒鳥忽高翔。吾亦自茲去。北

山歸州堂。抄冬正三五。日月遙相望。肅肅

過潁上。臄臄辨夕陽。川水生積雪。聖火出

枯桑。獨往路難盡。窮陰人易傷。傷此無衣

客。如何蒙雨霜。

唐詩選卷之一終

唐詩選卷之二

濟南李攀龍編選

七言古

滕王閣

王勃

滕王高閣臨江渚。佩玉鳴鸞罷歌舞。畫棟

朝飛南浦雲。朱簾暮捲西山雨。間雲潭影

日悠悠。物換星移幾度秋。閣中帝子今何

在。檻外長江空自流。

長安古意

盧照鄰

長安大道連狹斜，青牛白馬七香車。玉輦
 縱橫過主第，金鞍絡繹向侯家。龍銜寶蓋
 承朝日，鳳吐流蘇帶晚霞。百丈游絲爭繞
 樹，一羣嬌鳥共啼花。啼花戲鳥千門側，碧
 樹銀臺萬種色。複道交窗作合歡，雙闕連
 薨垂鳳翼。梁家畫閣天中起，漢帝金茎雲
 外直。樓前相望不相知，陌上相逢詎相識。

借問吹簫向紫煙，曾經學舞度芳年。得成
 比目何辭死，願作鴛鴦不羨仙。比目鴛鴦
 真可羨，雙去雙來君不見。生憎帳額繡孤
 鸞，好取開簾帖雙燕。雙燕雙飛繞畫梁，羅
 帷翠被鬱金香。片片行雲著蟬鬢，纖纖初
 月上。鴉黃鴉黃粉白車，中含嬌含態情
 非一。妖童寶馬鐵連錢，娼婦盤龍金屈膝。
 御史府中烏夜啼，廷尉門前雀欲栖。隱

朱城臨玉道遙遙翠幃沒金堤挾彈飛鷹
杜陵北探丸借客渭橋西俱邀俠客芙蓉
劍共宿娼家桃李蹊娼家日暮紫羅囊清
歌一轉口氤氳北堂夜夜人如月南陌朝
朝騎似雲南陌北堂連北里五劇三條控
三市弱柳青槐拂地垂佳氣紅塵暗天起
漢代金吾千騎來翡翠屠蘇鸚鵡杯羅襦
寶帶為君解燕歌趙舞為君開別有豪華

稱將相轉日回天不相讓意氣由來排灌
夫專權判不容蕭相專權意氣本英雄青
虬紫燕坐生風自言歌舞長千載自謂驕
奢凌五公節物風光不相待桑田碧海須
更改昔時金塔白玉堂只今惟見青松在
寂寂寥寥揚子居年年歲歲一床書獨有
南山桂花發飛來飛去襲人裾

公子行

劉廷芝

唐詩選 卷三 三 嵩山房

天津橋下陽春水天津橋上繁華子馬聲
迴合青雲外人影搖動綠波裏綠波清迥
玉為砂青雲離披錦作霞可憐楊柳傷心
樹可憐桃李斷腸花此日遨遊邀美女此
時歌舞入娼家娼家美女鬱金香飛去飛
來公子傍的的朱簾白日映娥娥玉顏紅
粉妝花際徘徊雙蛺蝶池邊顧步而鴛鴦
傾國傾城漢武帝為雲為雨楚襄王古來

容光人所羨况復今日遙相見願作輕羅
著細腰願為明鏡分嬌面與君相向轉相
親與君雙棲共一身願作貞松千歲古誰
論芳槿一朝新百年同謝西山日千秋萬
古北邙塵

代悲白頭公羽

洛陽城東桃李花飛來飛去落誰家洛陽
女兒惜顏色行逢落花長歎息今年花落

顏色改明年花開復誰在已見松栢權為
新更聞桑田變成海古人無復洛城東今
人還對落花風年年歲歲花相似歲歲年
年人不同寄言全盛紅顏子應憐半死白
頭翁此翁白頭真可憐伊昔紅顏美少年
公子王孫芳樹下清歌妙舞落花前光祿
池臺開錦繡將軍樓閣畫神仙一朝臥病
無相識三春行樂在誰邊宛轉蛾眉能幾

下山歌

宋之問

時須臾鶴髮亂如絲但看古來歌舞地惟
有黃昏鳥雀悲

下嵩山兮多所思攜佳人兮步遲遲松間
明月長如此君再遊兮復何時

至端州驛見杜五審言沈三佺期閣
五朝隱王二無競題壁慨然成咏

逐臣北地承嚴譴調到南中每相見豈意

南中岐路多，千山萬水分。鄉懸雲搖雨，散
各翻飛海。濶天長，音信稀。處處山川同瘴
癘，自憐能得幾人歸。

烏夜啼

李白

黃雲城邊烏欲棲，啼枝上啼。機中
織錦秦川女，碧紗如煙。隔牕語，停梭悵然
憶遠人。獨宿空房，淚如雨。

江上吟

木蘭之枻，沙棠舟。玉蕭金管，坐兩頭。美酒
尊中置，千斛載。妓隨波，任去留。仙人有待
乘黃鶴，海客無心隨白鷗。屈平詞賦懸日
月，楚王臺榭空山丘。興酣落筆搖五嶽，詩
成笑傲凌滄洲。功名富貴若長在，漢水亦
應西北流。

貧交行

杜甫

翻手作雲覆手雨，紛紛輕薄何須數。君不
甚詩

見管鮑貧時交此道今人棄如土

短歌行贈王郎司直

王郎酒酣拔劍斫地歌莫哀我能拔爾抑
塞磊落之奇才豫章翻風白日動鯨魚跋
浪滄溟開且脫劍佩休徘徊西得諸侯棹
錦水欲向何門跋珠履仲宣樓頭春色深
青眼高歌望吾子眼中之人吾老矣

高都護聽馬行

安西都護胡青驄聲價歛然來向東此馬
臨陳久無敵與人一心成大功功成惠養
隨所致飄飄遠自流沙至雄姿未受伏櫪
恩猛氣猶思戰場利躡促蹄高如踏鍊交
河幾蹴層冰裂五花散作雲滿身萬里方
看汗流血長安壯兒不敢騎走過製電傾
城知青絲絡頭為君老何由却出橫門道
送孔巢父謝病歸遊江東兼呈李太白

唐詩選 卷二

巢父掉頭不肯住東將入海隨烟霧詩卷
長留天地間釣竿欲拂珊瑚樹深山大澤
龍蛇遠春寒野陰風景暮蓬萊織女回龍
車指點虛無引歸路自是君身有仙骨世
人那得知其故惜君只欲苦死留富貴何
如草頭露蔡侯靜者意有餘清夜置酒臨
前除罷琴惆悵月照席幾歲寄我空中書
南尋禹穴見李白道甫問訊今何如

飲中八仙歌

知章騎馬似乘船眼花落井水底眠汝陽
三斗始朝天道逢麴車口流涎恨不移封
向酒泉左相日興費萬錢飲如長鯨吸百
川銜杯樂聖稱避賢宗之瀟灑美少年舉
觴白眼望青天皎如玉樹臨風前蘇晉長
齋繡佛前醉中往往愛逃禪李白一斗詩
百篇長安市上酒家眠天子呼來不上船

自稱臣是酒中仙張旭三杯州聖傳脫帽
露頂王公前揮毫落紙如雲煙焦遂五斗
方卓然高談雄辨驚四筵

哀江頭

少陵野老吞聲哭春日潛行曲江頭
宮殿鎖千門細柳新蒲為誰綠憶昔霓旌
下南苑苑中萬物生顏色昭陽殿裏第一
人同輦隨君侍君側輦前才人帶弓箭白

馬嚼啗黃金勒翻身向天仰射雲一箭正
墮雙飛翼明眸皓齒今何在血污遊魂歸
不得清渭東流劔閣深去住彼此無消息
人生有情淚沾臆江水江花豈終極黃昏
胡騎塵滿城欲往城南忌城北

韋諷錄事宅觀曹將軍畫馬圖

國初以來畫鞍馬神妙獨數江都王將軍
得名三十載人間又見真乘黃曾貌先帝

照夜白龍池十日飛霹靂內府殷紅瑪瑙
盤婕妤傳詔才人索盤賜將軍拜舞歸輕
紈細綺相追飛貴戚權門得筆跡始覺屏
障生光輝昔日太宗拳毛騮近時郭家獅
子花今之新圖有二馬復令識者久嘆嗟
此皆騎戰一敵萬縞素漠漠開風沙其餘
七匹亦殊絕迥若寒空動烟雪霜蹄蹴踏
長楸間馬官廐養森成列可憐九馬爭神

駿顧視清高氣深穩借問苦心愛者誰後
有韋諷前支遁憶昔巡幸新豐宮翠華拂
天來向東騰驤磊落三萬匹皆與此圖筋
骨同自從獻寶朝河宗無復射蛟江水中
君不見金粟堆前松柏裏龍媒去盡鳥呼風

丹青引贈曹將軍霸

將軍魏武之子孫於今為庶為清門英雄
割據雖已矣文采風流今尚存學書初學

衛夫人但恨無過王右軍丹青不知老將
至富貴於我如浮雲開元之中嘗引見承
恩數上南薰殿凌煙功臣少顏色將軍下
筆開生面良相頭上進賢冠猛將腰間大
羽箭褒公鄂公毛髮動英姿颯爽來酣戰
先帝天馬玉花驄畫工如山貌不同是日
牽來赤墀下迥立闔闔生長風詔謂將軍
拂絹素意匠慘澹經營中斯須九重真龍
出下洗萬古凡馬空玉花却在御榻上榻
上庭前屹相向至尊含笑催賜金圍人太
僕皆惆悵弟子韓幹早入室亦能畫馬窮
殊相幹惟畫肉不畫骨忍使驂駟氣凋喪
將軍善畫蓋有神必逢佳士亦寫真即今
漂泊干戈際屢貌尋常行路人途窮返遭
俗眼白世上未有如公貧但看古來盛名
下終日坎壈纏其身

邯鄲少年行

高適

邯鄲城南遊俠子。自矜生長邯鄲裏。干場
縱博家仍富。幾處報讐身不死。宅中歌笑
日紛紛。門外車馬如雲屯。未知肝膽向誰
是。令人却憶平原君。君不見。今人交態薄。
黃金用盡還疎索。以茲感歎辭舊遊。更於
時事無所求。且與少年飲美酒。往來射獵
西山頭。

人日寄杜二拾遺

人日題詩寄草堂。遙憐故人思故鄉。柳條
弄色不忍見。梅花滿枝空斷腸。身在南蕃
無所預。心懷百憂復千慮。今年人日空相
憶。明年人日知何處。一臥東山三十春。豈
知書劍老風塵。龍鍾還忝二千石。愧爾東
西南北人。

登古鄴城

岑參

唐詩選 卷二 三 嵩山房

下馬登鄴城。城空復何見。東風吹野火。暮
入飛雲殿。城隅南對望。陵臺漳水東。流不
復回。武帝宮中人。去盡年年春。色為誰來。

韋員外家花樹歌

今年花似去年好。去年人到今年老。始知
人老不如花。可惜落花君莫掃。君家兄弟
不可當。列卿御史尚書郎。朝回花底恆會
客。花撲玉缸春酒香。

胡笳歌送顏真卿使赴河隴

君不聞。胡笳聲最悲。紫髯綠眼胡人吹。吹
之一曲猶未了。愁殺樓蘭征戍兒。涼秋八
月蕭關道。北風吹斷天山州。崑崙山南月
欲斜。故人向月吹胡笳。胡笳怨兮將送君。
秦山遙望隴山雲。邊城夜夜多愁夢。向月
胡笳誰喜聞。

崔五丈圖屏風賦得烏孫佩刀

唐詩選

卷二

崔五丈圖屏風賦得烏孫佩刀

鳥孫腰間佩兩刀。刀可吹毛錦為帶。握中
枕宿穹廬室。馬上割飛蠟。螭塞執之。魍魎
誰能前。氣凜清風沙。漠邊磨用陰山一片。
玉洗將胡地。獨流泉主人屏風寫奇狀。鏤
鞞金環儼相向。回頭瞪目時。一看使予心
在江湖上。

李頎

答張五弟

王維

終南有茅屋。前對終南山。終年無客長閉
關。終日無心長自閒。不妨飲酒復垂釣。君
但能來相往還。

孟門行

崔顥

黃雀銜黃花。翩翩傍簷隙。本擬報君恩。如
何反彈射。金壘美酒滿。座春平原愛才多。
衆賓滿堂盡是忠義士。何意得有諛諛人。
諛言反復那可道。能令君心不自保。北園

唐詩選

卷二

嵩山房

新栽桃李枝根株未固何轉移成陰結實
君自取若問傍人那得知

贈喬林

張謂

去年上策不見收今年寄食仍淹留羨君
有酒能便醉羨君無錢能不憂如今五侯
不待客羨君不入五侯宅如今七貴方自
尊羨君不過七貴門丈夫會應有知己世
上悠悠安足論

湖中對酒作

夜坐不厭湖上月晝行不厭湖上山眼前
一樽又長滿心中萬事如等閒主人有黍
萬餘石濁醪數斗應不惜即今相對不盡
歡別後相思復何益茱萸灣頭歸路賒願
君且宿黃公家風光若此人不醉參差喜
負東園花

城傍曲

王昌齡

唐詩選

卷三

五言山房

秋風鳴桑條草白狐兔驕邯鄲飲來酒未
消城北原平掣皂鵬射殺空營兩騰虎迴
身却月佩弓鞞

洪州客舍寄柳博士芳

薛業

去年燕巢主人屋今年花發路傷枝年年
為客不到舍舊國存凶那得知胡塵一起
亂天下何處春風無別離

春江花月夜

張若虛

春江潮水連海平海上明月共潮生滟滟
隨波千萬里何處春江無月明江流宛轉
遶芳甸月照花林皆似霰空裏流霜不覺
飛汀上白沙看不見江天一色無纖塵皎
皎空中孤月輪江畔何人初見月江月何
年初照人人代代無窮已江月年年望
相似不知江月照何人但見長江送流水

唐詩選

卷二

共讀山房

白雲一片去悠悠青楓浦上不勝愁誰家
今夜扁舟子何處相思明月樓可憐樓上
月徘徊應照離人粧鏡臺玉戶簾中卷不
去擣衣砧上拂還來此時相望不相聞願
逐月華流照君鴻雁長飛光不度魚龍潛
躍水成文昨夜潭夢落花可憐春半不
還家江水流春去欲盡江潭落月復西斜
斜月沈沈藏海霧碣石瀟相無限路不知

乘月幾人歸落月搖情滿江樹

吳宮怨

衛萬

君不見吳王宮閣臨江起不捲珠簾見江
水曉氣晴來雙闕間潮聲夜落千門裏勾
踐城中冰舊春姑蘇臺下起黃塵抵今惟
有西江月曾照吳王宮裏人

帝京篇

駱賓王

山河千里國城闕九重門不覩皇居壯安

善詩選 卷三 七 嵩山房

知天子尊皇居帝里峻函谷鷄野龍山侯
甸服五緯連影集星纏八水分流橫地軸
秦塞重關一百二漢家離宮三十六挂殿
陰岑對玉樓椒房窈窕連金屋三條九陌
麗城隈萬戶千門平旦開復道斜通鳩鵲
觀交衢直指鳳凰臺劍履南宮入簪纓北
闕來聲名冠寰宇文物象昭回鉤陳肅蘭
彫壁沼浮槐市銅羽應風洞金莖承露起

校文天祿閣習戰昆明水朱邸抗平臺黃
扉通戚里平臺戚里帶崇牖炊金饌玉待
鳴鐘小堂綺帳三十戶大道青樓十二重
寶蓋雕鞍金絡馬蘭牕繡柱玉盤龍繡柱
璇題粉壁映鏘金鳴玉王侯盛王侯貴人
多近臣朝遊北里暮南鄰陸賈分金將燕
喜陳遵投轄尚留賓趙李經過密蕭朱交
結親丹鳳朱城白日暮青牛紺幘紅塵度

唐詩集

卷三

大鳴山房

唐詩選 卷二
俠客金彈垂揚道。娼婦銀鈎採桑路。娼家
桃李自芳菲。京華遊俠事輕肥。延年女弟
雙飛入。羅敷使君千騎歸。同心結縷帶連
理。織成衣。春朝桂尊尊百味。秋夜蘭燈燈
九微。翠幌珠簾不獨映。清歌寶瑟自相依。
且論三萬六千是。寧知四十九年非。古來
名利若浮雲。人生倚伏信難分。始見田竇
相移奪。俄聞衛霍有功勳。朱厭金陵氣先

開石槲文。朱門無復張公子。灞亭誰畏李
將軍。相顧百齒皆有待。居然萬化咸應改。
桂枝芳氣已銷亡。柏梁高宴今何在。春去
春來苦自馳。爭名爭利徒爾為。久留郎署
終難遇。空掃相門誰見知。當時一旦擅繁
華。自言千載長驕奢。倏忽博風生羽翼。須
臾失浪委泥沙。黃雀徒巢桂。青門遂種瓜。
黃金銷鑠素絲變。一貴一賤交情見。紅顏

唐詩選 卷二 七言古詩 七言古詩 七言古詩

宿昔白頭新脫粟布衣輕故人故人有湮
淪新知無意氣灰死韓安國羅傷翟延尉
已矣哉歸去來馬卿辭蜀多文藻揚雄仕
漢乏良媒三冬自矜誠足用十年不調幾
遭迴汲黯薪逾積孫弘閣未開誰惜長沙
傅獨負洛陽才

餘杭醉歌贈吳山人 丁仙芝

曉幙紅襟燕春城白項烏只來梁上語不

向府中趨城頭坎坎鼓聲曙滿庭新種櫻
桃樹桃花昨夜撩亂開當軒發色映樓臺
下千兌得餘杭酒二月春城長命杯酒後
留君待明月還將明月送君回

唐詩選卷之二終

唐詩選卷之三

濟南李攀龍編選

五言律

野望

王績

東臯薄暮望徙倚欲何依
樹樹皆秋色山山惟落暉
牧人驅犢返獵馬帶禽歸
相顧無相識長歌懷采薇

從軍行

楊炯

烽火照西京心中自不平
牙璋辭鳳闕鐵騎繞龍城
雪暗凋旗畫風多雜鼓聲
寧為百夫長勝作一書生

杜少府之任蜀州

王勃

城闕輔三秦風烟望五津
與君離別意同是官遊人
海內存知己天涯若比鄰
無為在岐路兒女共沾巾

勉次樂鄉縣

陳子昂

唐詩選

卷三

嵩山房

古鄉杳無際日暮且孤征川原迷舊國道
路入邊城野戍荒烟斷深山古木平如何
此時恨噉噉夜猿鳴

春夜別友人

銀燭吐青烟金尊對綺筵離堂思琴瑟別
路繞山川明月隱高樹長河沒曉天悠悠
洛陽去此會在何年

送別崔著作東征

金天方肅殺白露始專征王師非樂戰之
子慎佳兵海氣侵南部邊風掃北平莫賣
盧龍塞歸邀麟閣名

蓬萊三殿侍宴奉敕詠終南山

杜審言

北斗挂城邊南山倚殿前雲標金闕迥樹
抄玉堂懸半嶺通佳氣中峰繞瑞烟小臣
持獻壽長此戴堯天

和晉陵陸丞早春遊望

獨有官遊人偏驚物候新
雲霞出海曙梅柳度江春
淑氣催黃鳥晴光轉綠蘋
忽聞歌古調歸思欲沾巾

和康五望月有懷

明月高秋迥愁人獨夜看
暫將弓並曲翻與扇俱團
露濯清輝苦風飄素景寒
羅衣一此鑒頓使別離難

送崔融

春王行出將書記遠從征
祖帳連河闕軍麾動洛城
旌旗朝朔氣笳吹夜邊聲
坐覺烟塵掃秋風古北平

扈從登封途中作

宋之問

帳殿鬱崔嵬仙遊實壯哉
曉雲連幕卷夜火雜星回
谷暗千旗出山鳴萬乘來
扈遊良可賦終乏揆天才

送沙門弘景道俊玄莊還荊州應制

一乘歸淨域萬騎餞通莊就日離亭近彌

天別路長荆南旋杖鉢渭北限津梁何日

紆真果還來入帝鄉

長寧公主東莊侍宴 李嶠

別業臨青甸鳴壺降紫霄長筵鸚鵡鷺集仙

管鳳凰調樹接南山近煙舍北渚遙承恩

咸已醉戀賞未還饑

恩敕麗正殿書院賜宴應制得林字

張說

東壁圖書府西園翰墨林誦詩聞國政講

易見天心位竊和義重恩叨醉酒深載歌

春興曲情竭為知音

還至端州驛前與高六別處

舊館分江口淒然望落暉相逢傳旅食臨

別換征衣昔記山川是今傷人代非徃來

皆此路生死不同歸

幽州夜飲

涼風吹夜雨蕭瑟動寒林正有高堂宴能
思遲暮心軍中泣劍舞塞上重笳音不作
邊城將誰知恩遇深

宿雲門寺閣

孫逖

香閣東山下烟花象外幽懸燈千嶂夕卷
幔五湖秋畫壁餘鴻雁紗窗宿斗牛更疑

天路近夢與白雲遊

幸蜀西至劍門

玄宗皇帝

劍閣橫雲峻銜輿出狩回翠屏千仞合丹
嶂五丁開灌木縈旗轉仙雲拂馬來乘時
方在德嗟爾勒銘才

塞下曲

李白

塞虜乘秋下天兵出漢家將軍分虎竹戰
士臥龍沙邊月隨弓景胡霜拂劍花玉關

殊味入少婦莫長嗟

秋思

燕支黃葉落安望自登臺海上碧雲斷
單于秋色來胡兵沙塞合漢使玉關回
征客無歸日空悲蕙草摧

送友人

青山橫北郭白水遶東城此地一為別
孤蓬萬里征浮雲遊子意落日故人情
揮手

自茲去蕭蕭班馬鳴

送友人入蜀

見說蠶叢路崎嶇不易行山從人面起
雲傍馬頭生芳樹籠秦棧春流遶蜀城
外沈應已定不必問君平

秋登宣城謝眺北樓

江城如畫裏山曉望晴空
兩水夾明鏡雙橋落彩
虹人烟寒橘柚秋色老
梧桐誰念

北樓上臨風懷謝公

臨洞庭

孟浩然

八月湖水平，涵虛混太清。氣蒸雲夢澤，波撼
兵陽城。欲濟無舟楫，端居恥聖明。坐觀垂釣者，徒有羨魚情。

題義公禪房

義公習禪寂，結宇依空林。戶外一峯秀，階前
衆壑深。夕陽連雨足，空翠落庭陰。看取

蓮花淨，方知不染心。

終南山

王維

太乙近天都，連山到海隅。白雲迴望合，青
靄入看無。分野中峯變，陰晴衆壑殊。欲投
人處宿，隔水問樵夫。

過香積寺

不知香積寺，數里入雲峯。古木無人徑，深
山何處鐘。泉聲咽危石，日色冷青松。薄暮

空潭曲安禪制毒龍

登辨覺寺

竹逕從初地蓮峰出化城窗中三楚盡林
外九江平嫩州承趺坐長松響梵聲空居
法雲外觀世得無生

送平淡然判官

不識陽關路新從定遠侯黃雲斷春色画
角起邊愁瀚海經年別交河出塞流須令

外國使知飲月支頭

送劉司直赴安西

絕域陽關道胡沙與塞塵三春時有雁萬
里少行人首蓓隨天馬蒲萄逐漢臣當令
外國懼不敢覓和親

送邢桂州

鏡吹喧京口風波下洞庭赭圻將亦岸擊
汰復揚舲日落江湖白潮來天地青明珠

歸合浦應逐使臣星

使至塞上

單車欲問邊，屬國過居延。
征蓬出漢塞，歸雁入胡天。
大漠孤烟直，長河落日圓。
蕭關逢候騎，都護在燕然。

觀獵

風勁角弓鳴，將軍獵渭城。
山枯鷹眼疾，雪盡馬蹄輕。
忽過新豐市，還歸細柳營。
回看

射鵬處千里暮雲平

送張子尉南海

岑參

不擇南州尉，高堂有老親。
樓臺重蜃氣，邑里雜鮫人。
海暗三山雨，花明五嶺春。
此鄉多寶玉，慎勿厭清貧。

寄左省杜拾遺

聯步趨丹陛，分曹限紫微。
曉隨天仗入，暮惹御香歸。
白髮悲花落，青雲羨鳥飛。
聖朝

無闕事自覺諫書稀

登總持閣

高閣逼諸天。登臨近日邊。晴開萬井樹。愁看五陵烟。檻外低秦嶺。牕中小渭川。早知清淨理。常願奉金仙。

送劉評事克朔方判官賦得征馬嘶

高適

征馬向邊州。蕭蕭嘶未休。思深常帶別聲

斷為兼秋岐路風。將遠關山月共愁。贈君從此去何日。大刀頭。

送鄭侍御謫關中

謫去君無恨。關中我舊過。大都秋雁少。只是夜猿多。東路雲山合。南天瘴癘和。自當逢雨露。行矣慎風波。

使清夷軍入居庸

匹馬行將夕。征途去轉難。不知邊地別。抵

訝客衣單溪冷泉聲苦山空木葉乾莫言
關塞極兩雪尚漫漫

自薊北歸

驅馬薊門北北風邊馬哀蒼茫遠山口豁
達胡天開五將已深入前軍止半迴誰憐
不得意長劍獨歸來

醉後贈張九旭

世上漫相識此翁殊不然興來書自聖醉

後語尤顛白髮老間事青雲在目前床頭
一壺酒能更幾回眠

登兗州城樓

杜甫

東郡趨庭日南樓縱目初浮雲連海岱平
野入青徐孤嶂秦碑在荒城魯殿餘從來
多古意臨眺獨躊躇

房兵曹胡馬

胡馬大宛名鋒稜瘦骨成竹批雙耳峻風

入四蹄輕所向無空濶真堪託死生驍騰
有如此萬里可橫行

春宿左省

花隱掖垣暮啾啾棲鳥過星臨萬戶動月
傍九霄多不寢聽金鑰因風想玉珂明朝
有封事數問夜如何

秦州雜詩

風林戈未息魚海路常難候火雲峰峻懸

軍幕井乾風連西極動月過北庭寒故老
思飛將何時議築壇

送遠

帶甲滿天地胡為君遠行親朋盡一哭鞍
馬去孤城草木歲月晚關河霜雪清別離
已昨日因見古人情

題玄武禪師屋壁

何年顧虎頭滿壁畫滄州赤日石林氣青

唐詩選 卷三

天江海流錫飛常近雀杯渡不驚鷗似得
廬山路真隨惠遠遊

玉臺觀

浩劫因王造平臺訪古遊
絲雲蕭史駐文字魯恭留宮闕
通羣帝乾坤到十州人傳
有笙鶴時過北山頭

觀李固請司馬題山水圖

方丈渾連水天台總映雲
人間長見畫

去恨空聞范蠡舟偏小王喬鶴不羣
此生隨萬物何處出塵氛

禹廟

禹廟空山裏秋風落日斜
荒庭垂橘柚古屋畫龍蛇
雲氣生虛壁江聲走白沙
早知乘四載疏鑿控三巴

旅夜書懷

細州微風岸危檣獨夜舟
星隨平野濶月

唐詩選 卷三 十一

湧大江流名豈文章著官因老病休飄飄
何所似天地一沙鷗

船下夔州郭宿雨溼不得上岸別王

十二判官

依沙宿舸船石瀨月娟娟風起春燈亂江
鳴夜雨懸晨鐘雲外溼勝地石堂偏柔艣
輕鷗外含悽覺汝賢

登岳陽樓

昔聞洞庭水今上岳陽樓吳楚東南坼乾
坤日夜浮親朋無一字老病有孤舟戎馬
關山北憑軒涕泗流

次北固山下

王濟

客路青山外行舟綠水前潮平兩岸濶風
正一帆懸海日生殘夜江春入舊年鄉書
何處達歸雁洛陽邊

江南旅情

祖詠

楚山不可極歸路但蕭條海色晴看雨江
聲夜聞潮劍留南斗近書寄北風遙為報
空潭橋無媒寄洛橋

蘇氏別業

別業居幽處到來生隱心南山當戶牖澧
水映園林竹覆經冬雪庭昏未夕陰寥寥
人境外間坐聽春禽

望秦川

李頎

秦川朝望迥日出正東峰遠近山河淨遠
迤城闕重秋聲萬戶竹寒色五陵松客有
歸與歎淒其霜露濃

宿龍興寺

綦毋潛

香刹夜安歸松清古殿扉燈明方丈室珠
繫比丘衣白日傳心淨青蓮喻法微天花
落不盡處處鳥啼飛

胡笳曲

王昌齡

唐詩選 卷三 古嵩山房

城南虜已合。一夜幾重圍。自有金笳引。能令出塞飛。聽臨關月苦。清入海風微。三奏高樓曉。胡人掩淚歸。

同王徵君洞庭有懷 張謂

八月洞庭秋。瀟湘水北流。還家萬里夢。為客五更愁。不用開書帙。偏宜上酒樓。故人京洛滿。何日復同遊。

破山寺後禪院 常建

清晨入古寺。初日照高林。曲徑通幽處。禪房花木深。山光悅鳥性。潭影空人心。萬籟此俱寂。惟聞鐘磬音。

渡揚子江 丁仙芝

桂楫中流望。空波兩岸明。林開揚子驛。山出潤州城。海盡邊音靜。江寒朔吹生。更聞楓葉下。浙瀝度秋聲。

聞笛 張巡

唐詩選 卷三 王鷲山房

岩峩試一臨虜騎附城陰不辨風塵色安
知天地心門開邊月近戰苦陳雲深且夕
更樓上遙聞橫笛音

岳陽晚景

張均

晚景寒鴉集秋風放雁歸水光浮日出霞
彩映江飛洲白蘆花吐園红柿葉稀長沙
卑溼地九月未成衣

穆陵關北逢人歸漁陽

逢君穆陵路匹馬向桑乾楚國蒼山古幽
州白日寒城池百戰後耆舊幾家殘處處
蓬蒿偏婦人掩淚看

劉長卿

題松汀驛

張祐

山色遠含空蒼茫澤國東海明先見日江
白迥聞風鳥道高原去人煙小徑通那知
舊遺逸不在五湖中

聖果寺

釋處默

路自中峰上盤回出薜蘿到江吳地盡隔
岸越山多古木叢青靄遙天浸白波下方
城郭近鐘磬雜笙歌

唐詩選卷之三終

唐詩選卷之四

濟南李攀龍編選

五言排律

送劉校書從軍

楊炯

天將下三宮星門列五戎坐謀資廟略飛
檄竹文雄赤土流星劍鳥號明月弓秋陰
生蜀道殺氣繞湟中風雨何年別琴樽此
日同離亭不可望溝水自西東

靈隱寺

駱賓王

就鳥嶺鬱岩堯龍宮鎖寂寥樓觀滄海日門
對浙江潮桂子月中落天香雲外飄
登塔遠剝木取泉遙霜薄花更發冰輕葉
互凋夙齡尚遐異披對滌煩置待入天台
路看余渡石橋

宿温城望軍營

虜地寒膠折邊城夜柝聞兵符關帝闕天

策動將軍塞靜胡笳徹沙明楚練分風旗
翻翼影霜劍轉龍文白羽搖如月青山斷
若雲烟踈疑卷幔塵滅似鎖氛投筆懷班
業臨戎想顧勲還應雪漢賦持此報明君
在廣聞崔馬二御史並登相臺

蘇味道

振鷺纔飛日遷鶯遠聽聞明光共待漏清
覽各披雲喜得廊廟舉嗟為臺閣分故林

詩集卷之... 靈隱寺 駱賓王 蘇味道

懷柏悅新握阻蘭薰冠去神羊影車迎瑞
雉羣遠從南斗外遙望列星文

奉和幸韋嗣立山莊應制

李嶠

南洛師臣契東巖王佐居幽情遺紱冕宸
眷羈樵漁制下峒山蹕恩回灞水輿松門
駐旌蓋薜幄引簪裾石磴平黃陸烟樓半
紫虛雲霞仙路近琴酒俗塵疎喬木千齡

外懸泉百丈餘崖深經鍊藥穴古舊藏書
樹宿搏風鳥池潛縱壑魚寧知天子貴尚
憶武侯廬

白帝城懷古

陳子昂

日落滄江颺停撓問土風城臨巴子國臺
沒漢王宮荒服仍周甸深山尚禹功巖懸
青壁斷地險碧流通古木生雲際歸帆出
霧中川途去無限客思坐何窮

唐詩選 卷四 五言古詩 白帝山

峴山懷古

秣馬臨荒甸，登高覽舊都。
猶悲隨淚碣，尚想臥龍圖。
城邑遙分楚，山川半入吳。
丘陵徒自出，賢聖幾凋枯。
野樹蒼烟斷，津樓晚氣孤。
誰知萬里客，懷古正踟躕。

贈蘇味道

杜審言

北地寒應苦，南城戍不歸。
邊聲亂羌笛，朔氣捲戎衣。
雨雪關山暗，風霜艸木稀。
胡兵

戰欲盡，漢卒尚重圍。
雲淨妖星落，秋高塞馬肥。
據鞍雄劍動，搖筆羽書飛。
輿駕還京邑，朋遊滿帝畿。
方期來獻凱，歌舞共春暉。

沈佺期

並命登仙閣，通宵直禮闈。
大官供宿膳，侍史護朝衣。
卷幔天河入，開窗月露微。
小池殘暑退，高樹蚤涼歸。
冠劍無時釋，軒車待

漏飛明朝題漢柱三署有光輝

同韋舍人早朝

閭闔連雲起巖廊拂霧開玉珂龍影度珠履雁行來長樂宵鐘盡明光曉奏催一經傳舊德五字擢英材儼若神仙去紛從霄漢回千春奉休曆分禁喜趨陪

奉和幸長安故城未英宮應制

宋之問

漢王休息戰蕭相乃營宮壯麗一朝盡威靈千載空皇明帳前跡置酒宴羣公寒輕綵仗外春發幔城中樂思迴斜日歌詞繼大風今朝天子貴不假叔孫通

奉和晦日幸昆明池應制

春豫靈池會滄波帳殿開舟凌石鯨度槎拂斗牛迴節晦賞全落春遲柳暗催象溟看浴景燒劫辨沈灰鎬飲周文樂汾歌漢

武才不愁明月盡自有夜珠來

和姚給事寓直之作

清論滿朝陽高才拜夕郎還從避馬路來
接珥貂行寵就黃扉日威廻白簡霜柏臺
遷鳥茂蘭署得人芳禁靜鐘初徹更疎漏
更長曉河低武庫流火度文昌寓直光輝
重乘秋藻翰揚暗投空欲報下調不成章
早發始興江口至虛氏村作

候曉踰閩嶂乘春望越臺宿雲鵬際落殘

月蚌中開薛荔搖青氣枕椰鬢碧苔桂香

多露衰石響細泉回抱葉玄猿嘯銜花翡翠

翠來南中雖可悅北忠日悠哉鬢髮俄成

素丹心已作灰何當首歸路行翦故園萊

同錢揚將軍兼原州都督御史中丞

蘇頲

右地接龜沙中朝任虎牙然明方改俗去

病不為家將禮登壇盛軍容出塞華朔風
搖漢鼓邊月思胡笳旗合無邀正冠危有
觸邪當看勞旋日及此御溝花

奉和聖製途經華嶽 張說

西嶽鎮皇京中峰入太清玉鑾重嶺應緹
騎薄雲迎白日懸高掌寒空映削成軒遊
會神處漢幸望仙情舊廟青林古新碑綠
字生羣臣願封岱迴駕勒鴻名

奉和聖製早度蒲關 張九齡

魏武中流處軒皇問道迴長堤春樹發高
掌曙雲開龍負王舟度人占仙氣來河津
會日月天仗仗風雷東顧重關盡西馳萬
國陪還聞股肱郡元首咏康哉

和許給事直夜簡諸公

未央鐘漏晚仙宇靄沈沈武衛千廬合嚴
扃萬戶深左掖知天近南窻見月臨樹搖

金掌露庭接玉樓陰他日聞更直中宵屬
所欽聲華大國寶夙夜侍臣心逸興乘高
閣雄飛在禁林寧思竊抃者情發為知音
酬趙二侍御史西軍贈兩省舊寮之

作

石室先鳴者金門待制同操刀常願割持
斧竟稱雄應敵兵初起綠邊虜欲空使車
經隴月征旆繞河風忽枉兼金訊非徒秣

馬功氣清蒲海曲聲滿柏臺中顧已塵華
省欣君震遠戎明時獨匪報常欲退微躬
奉和聖製送尚書燕國公說赴朔方

軍

宗臣事有征廟算在休兵天與三台座人
當萬里城朔南方偃革河右暫揚旌寵賜
從仙禁光華出帝京山川勤遠略原隰軫
皇情為奏薰琴倡仍題瑤劍名聞風六郡

唐詩選 卷四 八 嵩山房

勇計日五戎平山甫歸應疾留侯功復成
歌鐘旋可望枕席豈難行四牡何時入吾
君聽履聲

奉和聖製暮春送朝集使歸郡應制

王維

萬國仰宗周衣冠拜冕旒玉乘迎大客金
節送諸侯祖席傾三省褰帷向九州揚花
飛上路槐色蔭通溝來預鈞天樂歸分漢

主憂宸章類河漢垂象滿中州

送李太守赴上洛

商山包楚鄧積翠黯沈沈驛路飛泉灑關
門落照深野花開古戍行客響空林板屋
春多雨山城晝欲陰丹泉通虢略白羽抵
荆岑若見西山爽應知黃綺心

送秘書晁監還日本

積水不可極安知滄海東九州何處遠萬

唐詩選 卷四 九 嵩山房

里若乘空向國惟看日歸帆但信風驚魚身
映天黑魚眼射波紅鄉國扶桑外主人孤
島中別離方異域音信若為通

送儲邕之武昌

李白

黃鶴西樓月長江萬里情春風三十度空
憶武昌城送爾難為別銜杯惜未傾湖連
張樂地山逐泛舟行諾謂楚人重詩傳謝
眺清滄浪吾有曲寄入櫂歌聲

陪張丞相自松滋江東泊渚宮

孟浩然

放溜下松滋登舟命楫師寧忘經濟日不
憚近寒時洗幘豈獨古濯纓良在茲政成
人自理機息鳥無疑雲物凝孤嶼江山辨
四維晚來風稍緊冬至日行遲獵響驚雲
夢漁歌激楚辭渚宮何處是川暝欲安之
送柴司戶充劉卿判官之嶺外

高適

嶺外資雄鎮朝端寵節旄月卿臨幕府星
 使出詞曹海對羊城濶山連象郡高風霜
 驅瘴癘忠信涉波濤別恨隨流水交情脫
 寶刀右才無不適行矣莫徒勞

陪竇侍御泛靈雲池

白露先時降清川思不窮江湖仍塞上舟
 楫在軍中舞換臨津樹歌饒向勉風夕陽

連積水邊色滿秋空乘興宜投轄邀歡莫
 避驄誰憐持弱羽猶欲伴鷓鴣

行次昭陵

杜甫

舊俗疲庸主群雄問馱夫讖婦龍鳳質威
 定虎狼都天屬尊堯典神功協禹謨風雲
 隨絕足日月繼高衢文物多師古朝廷羊
 老儒直詞寧戮辱賢路不崎嶇往者災猶
 降蒼生喘未蘇指揮安率土盪滌撫洪鑪

壯士悲陵邑幽人拜野湖
玉衣晨自舉鐵馬汗常趨
松栢瞻虛殿塵沙立暝途
寂寥開國日流恨滿山隅

重經昭陵

草昧英雄起謳歌曆數歸
風塵三尺劍社稷一戎衣
翼亮貞女德丕承戢武威
聖圖天廣大宗祀日光輝
陵寢盤空曲熊羆守翠微
再窺松栢路還見五雲飛

王閬州筵奉酬十一舅惜別之作

萬壑樹聲滿千崖秋氣高
浮舟出郡郭別酒寄江濤
良會不復久此生何太勞
窮愁但有骨羣盜尚如毛
吾舅惜分手使君寒贈袍
沙頭暮黃雀失侶亦哀號

春歸

苔徑臨江竹茅簷覆地花
別來頻甲子歸到忽春華
倚杖看孤石傾壺就淺沙
遠鷗

唐詩選
卷四
浮水靜輕燕受風斜世路雖多梗吾生亦
有涯此身醒復醉乘興即為家

江陵望幸

雄都尤壯麗望幸歛威神地利西通蜀天
文北照秦風煙含越鳥舟楫控兵人未枉
周王駕終期漢武巡甲兵分聖旨居守付
宗臣早發雲臺仗恩波起涸鱗

奉觀嚴鄭公廳事岷山沱江圖

沱水臨中座岷山赴北堂白波吹粉壁青
嶂挿雕梁直訝杉松冷兼疑菱苻香雲
虛點綴沙艸得微茫嶺雁隨毫末川霓飲
練光霏紅洲蕊亂拂黛石蘿長暗谷非關
雨丹楓不為霜秋城玄圃外景物洞庭傷
繪事功殊絕幽襟興激昂從來謝太傅丘
壑道難忘

冬日洛城北謁玄元皇帝廟廟有吳

道士畫五聖圖

配極玄都闕，憑高禁籙長。守祧嚴具禮，掌節鎮非常。碧瓦初寒外，金莖一氣芳。山河扶繡戶，日月近雕梁。仙李盤根大，猗蘭奕葉光。世家遺舊史，道德付今王。畫手看先輩，吳生遠擅場。森羅移地軸，妙絕動宮牆。五聖聯龍袞，千官列雁行。冤旒俱秀發，旌飾盡飛揚。翠柏深留景，紅梨迥得霜。風篁

吹玉柱，露井凍銀床。身退卑周室，經傳拱漢皇。谷神如不死，養拙更何鄉。

聖善閣送裴迪入京 李頎

雪華滿高閣，苔色上勾欄。藥州空塔靜，梧桐返照寒。清吟可愈疾，携手暫同歡。墜葉和金磬，饑鳥鳴露盤。伊流惜東別，灑水向西看。舊託含香署，雲霄何足難。

早秋與諸子登魏州西亭觀眺

亭高出鳥外客到與雲齊樹點千家小天
圍萬嶺低殘虹挂陝北急雨過關西酒榼
緣青壁瓜田傷綠溪微官何足道愛客且
相携唯有鄉園處依依望不迷

岑參

清明宴司勳劉郎中別業

祖詠

田家復近臣行樂不違親霽日園林好清

明烟火新以文常會友惟德自成隣池照
窻陰晚杯香藥味春攔前花覆地竹外鳥
窺入何必桃源裏深居作隱淪

奉使巡檢兩京路種果樹事畢入秦

因詠歌

鄭審

聖德周天壤韶華滿帝畿九重承灑泚千
里樹芳菲陝塞餘陰薄關河舊色微發生
和氣動封植衆心歸春露條應弱秋霜果

唐詩選

卷四

五言古詩

定肥影移行子蓋香撲使臣衣入徑迷馳

道分行接禁闈何當扈仙蹕攀折奉恩輝

行營酬呂侍御 劉長卿

不敢淮南卧來趨漢將營受辭瞻左鉞扶

疾拜前旌井稅鷄衣樂壺將雀髮迎水歸

餘斷岸烽至掩孤城晚日當千騎秋風合

五兵孔璋才素健早勉檄書成

送鄭說之歙州謁薛侍郎

漂泊來千里謳歌滿百城漢家尊太守魯

國重諸生俗變人難理江傳水至清船經

危石住路入亂山行老得滄洲起春傷白

首情嘗聞馬南郡門下有康成

女訓孝經教壽 此本邦の孝の教を和らぐものなり

弟子職經典餘師 此書ハ孝の教を和らぐものなり

唐詩選和訓全四冊 一名經典餘師ハ支平ウカク和訓男女


心學俗語 此ハ世の人情の及利を憐れむものなり

太宰先生増注家語 今ク其の意を初めんとす

近代家田先生注 十葉先生標

家田先生 合考を更にとりて則

後身 ハ月小異ありや因て氏の家上下は也



Handwritten markings in the lower-left corner, possibly a signature or initials, rendered in black ink.